

1012
AGREABLE RECIT
DE CE QVIS'EST PASSE
AVX DERNIERES
BARRICADES
DE PARIS.

Descrites en Vers Burlesques.



A P A R I S,

Chez MICHEL METTAYER, Imprimeur ordinaire du
Roy, demeurant en l'Isle Nostre Dame sur le Pont
Marie, au Cigne.

M. D C. XLIX.

72.



L E S

BARRICADES.

IE veux chanter les Barricades,
 Et les populaires bourades,
 Dont tout Paris fut alarmé
 Quand le Bourgeois armé
 Donna de si belles vezardes
 A nos braues Soldats de Gardes,
 Et fit voir que le batelier
 Est dangereux sur son paillier.
 Raconte moy, muse grotesque,
 D'oùvient cette humeur soldatesque,
 Apprens-moy de ces mouuemens
 Quels furent les commencemens,
 Et quel succez eut la furie
 De la nouvelle Iaquerie.
 Depuis tantost cinq ou six ans
 L'avarice des Partisans,
 Traitans, Soutraitans, gens d'Affaire,
 Race à nostre bonheur contraire,
 Pilloit avec impunité
 Les biens du peuple en liberté,
 Et sous pretexte du Tariffe
 Rien ne s'échappoit de leur griffe.
 Ce mal nous deuorant
 Et comme on voit vn torrent
 Tombant du sommet des montagnes
 Se répandant sur les campagnes,
 Estendre par tout sa fureur.
 Porter la crainte & la terreur
 Dans les villes & les villages,
 Ainsi l'excez de leurs pillages

Comme celuy de leur pouuoit
Nous reduisoit au desespoir,
Quand le bon Demon de la France
Touché de voir nostre souffrance,
Fit que perdant le iugement
Ils se prirent au Parlement,
Se promettant que leur malice
Triompheroit de la Iustice.
Et que ce grand Corps atterré
Leur repos seroit assuré.
La Polette fut la machine
Qui fut destinée pour sa ruyne,
Et le piege que l'on tendit
Aux Officiers certain Edict,
Lequel mettoit en apparence
Leurs Offices en assurance.
On demandoit par cét Arrest
Comme par maniere de prest
Quatre anneés de tous leurs gages,
Mais lors quel'on vient aux suffrages
Il parut & non sans raison
Deffous le miel quelque poison,
Dont la liqueur estoit mortelle
A la santé de l'escarcelle.
En mesme temps de tous costez
Des autres corps les Deputez
Attaquez de pareilles craintes,
Arriuent, parlent, font leurs plaintes
Contre la persecution,
Implorent la protection
De ceux qu'ils appellent leurs Peres,
Disent l'estat de leurs miseres,
Et que sans doute ils sont perdus
Si par eux ne sont defendus,
Demandant que chacun s'vnisse
Pour resister à l'iniustice,
Et remonstrer coniointement

5
A la reyne ce traitement.
Cette affaire mise en balance
Fut estimée de consequence,
Et comme il ne faut sottement
S'embarquer, ny legerement
L'vnion tres fort balottée
Ne fut pas d'abord arrestée,
Les registres sont apportez
Et soigneusement consultez,
On lit, on voit, on examine
La loy ciuile & la diuine:
Mais enfin pour conclusion
Les voix furent à l'vnion:
Les Partisans par cette voye
Voyans éuanouyr leur proye,
Et leur fonds estre diuertý,
Duquel ils auoient faict party,
Et s'il faut dire quelque auance
Baptisent cecy d'insolence,
Qui faict breche à l'autorité
De la Royale Majesté,
Ainsi qu'aux droits de la Couronne,
De tous costez cecy resonne,
Et le Conseil faict vn Edict
Qui l'vnion leur interdit;
Le Parlement demeurant ferme,
Et la chose estant en ce terme,
On mit par aduis du Conseil
Au mal vn second appareil.
Et pour dissiper cét orage
Quelques gens furent mis en cage,
Si l'on fit mal, si l'on fit bien.
Ie m'en rapporte & n'en sçay rien,
Et pour dire vray ne me pique
De me connoistre en Politique,
Car en ce mestier le hazard
A souuent la meilleure part:

Aux nouuelles de cette prise
La Bazoché fut fort surprise,
Ce mal au lieu de ce calmer
Parut de nouveaux s'allumer,
On s'assemble, on crie, on proteste
Qui iure, qui gronde, qui peste,
Quelqu'un parle plus hautement
Et se plaint du gouvernement,
J'entends celuy de la finance,
Pour l'autre on garde le silence,
C'est bien assez de le penser,
De peur de se trop auancer,
Cependant la Reyne Regente
Comme elle est sage & tresprudente,
Voulant à cecy promptement
Trouuer quelque temperament,
Remet, pensant calmer l'affaire,
La Polette à son ordinaire;
Fit reuenir les exiléz
De la frontiere rappelez;
Mais defendit aux Compagnies
De se treuer encore vnies,
Puisque leur remettant le prest
Elles estoient hors d'intrest.
Neantmoins Messieurs des Enquestes
Dont aucuns sont de fortes testes,
Et d'ordinaire à dire net
L'ont assez proche du bonnet,
Furent d'opinion contraire,
L'un dit Messieurs, c'est vn mystere
Si nous cessons d'estre assemblez
Dans trois iours nous sômes sanglez,
Nos biens, de mesme que nos vies,
Releueront de ces harpies;
Enfin, ce n'est pas d'aujourd'huy
Qu'on dit ce qu'il te fait, fait luy.
Machiauel grand Politique

Qui des Cours auoit la pratique,
 Dans son damnable art de regner
 Ne l'a sceu que trop enseigner,
 Toutes les faueurs apparentes
 Sont des marques tres-euidentes
 Du venin caché la deffous.
 Hela Messieurs souuenez-vous
 De Sinon, du Cheual de Troye,
 Comme Illium fut mis en proye,
 Et le vieil Priam peu ruse,
 Sous vn faux cheual abusé,
 Permettez que ie vous le die
 Tout cecy n'est que Comedie,
 Les biens receus hors de saison,
 Les recompenses sans raison.
 Ainsi que les chants des Sirenes
 Marquent les tempestes prochaines,
 Le salut dans vn mauuais pas
 Consiste à ne relacher pas,
 Souuent c'est proche du riuage
 Que les marelots font naufrage;
 En deux mots voicy mon aduis
 Si mes sentimens sont suiuis :
 Messieurs, auant toute autre chose,
 Affin d'affermir nostre cause
 Qui n'est pas sans besoin d'appuy,
 Nous concludrons tous auourd'huy
 Que l'on soulage la canaille,
 Qu'on remette le quart de la Taille,
 Que de nos pays desolez
 Les Intendans soient rappellez ;
 Que les Eleus bien que vermine
 Exercent au moins pour la mine,
 Soient remis en leurs fonctions,
 C'est par telles inuentions
 Que le peuple prompt & volage
 Semeur, se conduit & s'engage,

Quand le peuple sera pour nous
 Sans doute qu'on filera doux.
 Mais si nous manquons cette voye,
 Quelque temps calme que ie voye,
 L'apprehende fort l'interdit,
 Songez y bien. Messieurs, i'ay dit.
 Lors chacun parlant à l'oreille
 Avec son voisin se conseille,
 Faut-il le croire, ce dit-on,
 L'un dit qu'ouy, l'autre que non,
 Tel est d'opinion diuerse,
 L'un la suit, l'autre la traaverse;
 L'un dit que c'est trop attenté;
 L'autre la seule seureté.
 Cette venerable consulte
 Auoit fort de l'air d'un tumulte,
 Et comme nous voyons souuent
 Lors que l'on chasse à mauuais vent
 Que des voix de diuers meſlange
 Fôt aux vieux chiës prédre le chāge,
 Ou confus dans vn si grand bruit
 Pour suivre les voyes de la nuit,
 Encor' que parmy cette émeute
 Les Presidens chefs de la meute
 D'abord ne donnassent les mains,
 Tous leurs obstacles furent vains,
 Sans fruit les vieillards s'opposèrent,
 Enfin les fondeurs l'emporterent,
 Et suivant leur intention
 L'on se tient à la ionction.
 D'Emery contre son attente
 Trouua la fortune changeante,
 Par des conseils accommodans
 On reuoqua les Intendans.
 La Reyne mesme, à ce qu'il semble
 Trouue fort bon que l'on s'assemble,
 Gens de Palais & gens de Cour

Ont conference à Luxembourg,
 Le Duc d'Orleans fils de France
 Au Parlement prit sa seance,
 Et le feu loin de s'embraser
 Paroissoit quasi s'appaiser,
 Alors que la prison nouvelle
 Du bon homme Monsieur Bruxelles,
 Riche d'honneur & pauvre de biens,
 Arma tous ses concitoyens.
 Ce fut au temps que la victoire
 Amoureuse de nostre gloire
 Fit à Lens, ainsi qu'à Rocroy,
 Triompher nostre jeune Roy
 De ces redoutables cohortes
 Qui sembloient menacer nos portes.
 L'Illustre Prince de Condé
 Par son courage secondé,
 Avec ses troupes comme vn foudre
 Mit tous leurs Escadrons en poudre,
 Et les suiuant iusqu'à Douay
 Vengea la perte de Courtray,
 Chacun benissoit sa prouesse,
 Tout estoit remply d'allegresse.
 Mais comme vn beau iour d'Esté
 Plein de lumiere & de clarté.
 Le Ciel se couurant de nuage
 Change le beau temps en orage,
 Et des ruisseaux font vne mer,
 Nostre plaisir deuient amer,
 La ioye en nos cœurs preparée
 Ne fut pas de longue durée:
 De tout temps nos Roys tres-pieux
 Par vn zele deuotieux
 Quand le Ciel a beny nos armes
 Et la valeur de nos gendarmes
 Vont en cortege solennel
 Rendre graces à l'Eternel,
 Dedans le Temple où l'on reuerce

Le nom de sa tres-chaste Mere,
 Les Gardes dès le poinct du iour
 Assemblez au son du tambour
 Dans le Marché neuf se logerent
 Et sur le Pont neuf se posterent.
 Quand la Reyne estant de retour
 Vn bruit s'épand tout à l'entour
 Que l'on auoit pris le bon homme
 Que le peuple son Pere nomme,
 L'un dit, on l'a mené par là,
 L'autre cecy, l'autre cela,
 Le murmure eschauffe les bises
 Des batteliers gens mal dociles,
 Et chacun s'arme aux enuiron
 Qui de crocs, & qui d'auirons,
 De cailloux, de pics & de peles,
 De bāns, de treteaux, d'escabelles,
 De barres de fer, de leuiers,
 De grez que l'on prend au lauiers,
 Ce peuple farouche & fantasque,
 Irue, maudit, peste, renaque,
 Tout est plein de confusion,
 D'horreur & de sedition,
 Des plaintes ont vient aux murmures,
 Aux cris, aux fureurs, aux iniures,
 Et les soldats du Regiment
 Repoussez assez brusquement,
 Voyans leur partie trop mal faite
 Firent vne prompte retraite,
 Et dans ce bizarre combat
 Quelques-vns sont mis au grabat,
 Le peuple fait les Barricades,
 Les poursuiuans avec brauades,
 De tous costez on fait grand bruit,
 On court, on s'auance, on fuit,
 Maçons, Charpentiers, Alchimistes,
 Imprimeurs, Relieurs, Copistes,
 Garçons de postes & de Relais,

Colporteurs & Clercs du Palais,
Tailleurs, Pagas d'Apotiquaires,
Maquignons, Ecorcheurs, Libraires,
Fourbisseurs, Charrons, Batteliers,
Chrocheteurs, Doreurs, Ecoliers,
Crieurs de noir & d'eau de vie,
Moutardiers & vendeurs d'oublie,
Crieurs de passément d'argent,
Assistans, Recors & Sergent,
Meneurs de paquets & brouettes,
Marqueurs, enfans de la raquette,
Porte-chaires, passeurs de bac,
Vendeurs de pipes & de tabac,
Cureurs de puits & de gadouë,
Chartiers qui menent la bouë.
Mareschaux, Forgerons, Celliers,
Par tout s'espandent par milliers:
Aux Halles les Fripiers s'armerent,
Et les Bourgeois se cantonnerent,
Auprès aussi bien comme au loin,
Sur le Quay, sur le port au Foin,
Chacun son Compagnon reclame,
Fourbit son mousquet & sa lame,
Etiure sans cesse morbieu,
Prend l'hallebarde ouquelque épieu.
Cette martiale iournée
Par la nuit ne fut terminée,
On oit de moment en moment,
Sans sçauoir pourquoy ny comment,
Aux portes & par la fenestre,
Peter fortement le salpestre,
Et ces gens, à n'en mentir point,
Estoient braues au dernier point.
Le lendemain la belle Aurore
Les trouua tous armez encore,
Et comme ils n'auoient pas dormy,
Remplis de vin plus qu'à demy,
De ce ius leur ame eschauffée

Se promettoit quelque trophée:
 Le Chancelier à ce matin
 Conduit par son mauuais destiñ
 Porroit à la Cour Souueraine
 Vn ordre enuoyé par la Reine;
 On luy crie demeure là,
 Luy surpris de ce qui va là,
 Terme ordinaire de milice,
 Peu cognu aux gens de Iustice
 Les ayant appelez mutins
 Gagna le Quay des Augustins;
 Le peuple s'ëmeut dans la rue,
 Le suit, le clabaude, le hue:
 Le Chancelier fendit le vent,
 Le peuple le va poursuivant,
 Et quelque gent fiere & mutine
 Inuestit l'Hstel de Luyne,
 Rompt la porte de la maison,
 L'vn en sa main tient vn rison,
 Vn chenet, vne lichefrite,
 Le couuercle d'vne marmite,
 Ils iurent tous qu'il en mourra
 Et que rien ne le sauuera
 Luy reduit à cët accessoire,
 Et qui pour auoir leu l'Histoire
 Sçait fort bien comme d'autrefois
 Sous le regne des anciens Rois
 Vn Chancelier fut mis en broche
 Par le noble escorcheur Caboche,
 Assisté de quelques mutins,
 Vulgairement des Maillotins,
 Crût sa derniere heure venue,
 A deux genoux la teste nue,
 Dans ce peril rude & pressant
 Il inuoquoit le Tout puissant,
 Et fit, comme on le peut croire,
 A l'Euesque de Meaux son frere,
 De ses pechez confession,

Auec

Avec protestation,
 Que si du danger il eschappe
 Iamais plus on ne l'y attrappe:
 De ces angoisses oppressé,
 Aussi pale qu'un tref passé,
 Les Gardes viennent à la file,
 D'abord la canaille fait gile:
 Mais suruint à cet accident
 Le Marechal Surintendant,
 Toujours fier comme son espée
 Au sang des ennemis trempée,
 Dont il occit un Crocheteur
 Qui n'estoit là que spectateur,
 Excitant sur luy mainte pierre.
 Qui pensa le ietter à terre,
 Et d'Ortis arriuant soudain
 Prit le Chancelier par la main,
 Que la Cronique medisante
 Dit, qu'il auoit froide & tremblante,
 Et ce grand Ministre d'Estat
 Eschappé de cet attentat,
 Crainte de pareille bourasque
 Avec la vitesse d'un basque,
 Alla chercher sa seureté
 Au Palais de sa Majesté.

La fuite de cette heure extreme
 Pour tous les siens ne fut de mesme,
 Sur le Pont-neuf l'Exempt Picot
 A la mort paya son escot:
 Sa triste & funeste auanture,
 Sans qu'il soit besoin qu'on en iure,
 Fait voir que pour ne pas mourir
 Il n'est rien tel que bien courir,
 Et qu'en de semblables affaires
 Les iambes sont tres-necessaires.
 Laissons ce Ministre dispos,
 Au Palais Royal en repos.
 Faisons un tour parmi les rues.

Par tout les chaisnes sont tendues,
 Des caues on sort des tonneaux,
 On amene des tombereaux,
 Des chariots & des charrettes,
 On appreste les escoupettes,
 Et nos Bourgeois tous resolus,
 Vieux soldats tout frais esmoulus
 Sont attachez aux Barricades
 Comme forçats à leurs rocades,
 Carmeline l'Operateur,
 Vestu d'un colet de senteur,
 Chaussés de Damas à ramage,
 La grosse fraize à double estage,
 Bas d'attache & de brodequin,
 De vache noire ou de maroquin,
 Le sabre pendant sur la hanche,
 Et sur tout l'escharpe blanche,
 Tenant en main bec de corbin,
 Monté sur un cheual Aubin,
 Gardoit avec six cens & onze
 Le poste du cheual de bronze,
 Et fit assez diligemment
 Un bizarre retranchement.
 De cette belle architecture
 A peu pres voicy la peinture,
 De l'un iusqu'à l'autre p.llier
 On met des dents un ratelier;
 Sur les dents on mit les machoires,
 Des brayers, des suppositoires,
 Des Pollicans, des Bistoris,
 Des boettes de poudre d'Iris,
 Des chalits des portes, des cruches,
 Des coquemars, des œufs d'Autruche
 Quelques saloirs remplis de lard,
 Et sur ce solide rempart
 On fit un parapet de grilles.
 Par où guigniôit deux crocodilles,
 Il est vray qu'ils ne viuoient pas,

Mais chacun ne le sçauoit pas,
 La forme estoit pentagonale,
 Triangulaire ou bien ouale,
 Qui voudroit en leuer le plan
 Ne le sçauoit en moins d'un an,
 Je donne au grand Archimede,
 Aux compagnons de Diomede,
 A Vitruue, a Nostradamus
 A feu l'ingenieux Camus,
 Gamorin, Targon & de Ville,
 A Roberual qui monstre en ville,
 Villedot, Mercier, Mestrezau,
 Sain& Felix, le Pautre, le Veau,
 Iean Tiriot qui fit la digue,
 Et traçoit du temps de la digue
 Aux Ingenieurs des Allemans.
 Aux Hollandois & aux Flamans,
 A Stenin cōme au sieur des Cartes,
 A Bleu qui descrit tant de cartes,
 A Mercator, à Oudinet,
 Au Geographe Bertinet,
 Avec compas Mathematiques,
 Instrumens nouueaux & antiques,
 D'en faire la description
 Dans la iuste dimension,
 Tant l'art auoit mis d'artifice
 A bastir ce noble edifice.
 A la Halle & aux environs
 On se retranche de marons,
 De citrouilles, de pōmes pourries,
 De choux, de cōcombres, d'orties,
 De cresson pourpier & naueaux,
 Artichaux, raues & porreaux,
 Prunes, grugnons, poires, oranges,
 Les cabats traissent dās les fanges,
 Et le cordon de ce trauail
 Fut fait de fine gouffe d'ail,
 Et l'on adiousta quelques bottes

De tres-puantes eschalottes,
 Ce qui faisoit vn bel effet,
 Dont le peuple fut satisfait,
 Derriere maintes Harangères.
 Plus affreuses que des Megeres,
 Mettant la main sur les roignons
 Crioient par la teste aux oignons,
 Ces traistres nous l'ont donné belle,
 Viue le Roy, viue Bruxelles,
 Viue la Cour de Parlement,
 Et sucre du gouuernement:
 Elles adoustoient autre chose
 Qui ne se peut dire qu'en prose.
 Harangeres certainement
 A le dire confidamment
 Meriteroient d'estre fessées,
 Et d'auoir les langues couppées.
 Mais passons aux autres cartiers
 Où les garçons de tous mestiers
 quittans le soin de la boutique
 Prénoient l'hallebarde ou la pique
 Le coutelas ou l'espadon,
 Le brin d'estoc ou le bourdon,
 Chacun saisissant à la haste
 Ce qui se trouue sous sa pate,
 Seruantes au haut des greniers
 Portoient cailloux à pleins paniers,
 Les femmes estoient aux fenestres,
 Tout s'en mesloit hormis les Prestes,
 Mais ceux qui n'estoient qu'*in sacris*,
 Animoient les gens par leurs cris,
 de barricade en barricade
 Constantin iouoyt sa boutade,
 Et par vn martial fredon
 Sonnoit l'alarme en faux-bourdon,
 Au milieu de ce grand desordre
 On voit arriuer en bon ordre
 A pas comptez & grauement.

L'Illustre Cour de Parlement,
Tout le peuple leur fait grand feste,
Mais inclinant par fois la teste
Avec vn modeste soufris
Flattant ces nouueaux aguerris,
Ils trouuerent la populace
Laquelle s'ouure & leur fait place,
Leur dit, allez nos Protecteurs;
Abolissez les Collecteurs:
Ou bien du moins faites en somme
Que vous rameniez le bon homme
Cependant au Palais Royal
On discouroit qui bien, qui mal,
L'vn disoit c'est trop entreprendre,
L'autre, ils font bien de se defendre,
Enfin la Reine les receut,
Et les Huissiers ayant fait chut,
Molé d'un visage assez ferme
Luy parla à peu près en ce terme:
Reine l'image du grand Dieu,
Si nos souhaits auoient eu lieu,
Et que pour le bien de la France
On eust pris en nous confiance,
Ce tumulte hors de propos
Ne troubleroit vostre repos.
Quoy dans l'allegresse publique
Par vne fausse politique
Mettre hors temps & saison
Les bons Magistrats en prison
Pour auoir avec assurance
Dit leur aduis en conscience
Ce qui maintient les potentats,
Le plus ferme appuy des Estats,
Est de regner avec iustice,
Mettre en vsage l'artifice,
La fourbe & le déguisement,
Madame, ces mauuais copistes
Des conseils Machiauelistes.

Qui feduisent vostre douceur,
 Eloignant de nous vostre cœur
 Par des raisons imaginaires
 Au bien de vostre Estat contraires,
 Vous disans pour leur interest
 La chose autrement qu'elle n'est:
 Mais las! il n'est plus temps de feindre
 Tout s'émeut, le peuple est à craindre,
 Dieu quel peuple! vn grād peuple armé
 De rage, de fureur animé,
 Qui met son salut en ses armes,
 Lors quelques veritables larmes,
 Quoy que disent les enuieux,
 Parurent couler de ses yeux;
 Puis avec la mesme eloquence
 Avec vne entiere assurance
 Il poursuiuit: Ne craignez pas,
 Madame, de faire vn faux pas,
 Cedant comme il est necessaire
 A la fureur du populaire,
 Quand le vent agite les flots
 Les plus habiles matelots
 Pour se garantir du naufrage,
 Par vn conseil prudent & sage
 Au lieu de resister au vent
 Calent le voile bien souuent,
 Et les yeux arrestez sur l'Ourse
 Nauigent d'une oblique course.
 Ce que pratiquent les nochers
 Parmi les bancs & les rochers
 Apprend aux Rois à se conduire
 Dans les troubles de leur Empire,
 Comme ce perfide element,
 Le peuple s'émeut aisément,
 Mais il s'appaise tout de mesme,
 Vostre sagesse toute extrême,
 Madame, éloignera de nous
 Ce malheur dont ie crains le cours,

En accordant à nos prieres
 La liberté de nos Confreres ;
 Le peuple à le mesme desir,
 Il n'y a pas lieu de choisir,
 Je crains que perdant l'esperance
 Il n'en vienne à la violence,
 Ce sont des cheuaux échapez,
 D'ardeur & de fougue emportez,
 Dont la fureur choque & renuerse
 Tout ce qui vient à la trauerse,
 Faciles à s'effaroucher,
 Difficiles à rapprocher.
 Songez bien que cette iournée
 Doit faire nostre destinée,
 Que pour le salut de l'Estat
 Il faut terminer ce debat,
 Et qu'à des troupes bien armées
 D'un iuste pretexte animées,
 Les canons tous prests à tonner,
 Refuser tout, c'est tout donner.
 La Reine pleine de sagesse
 Dissimulant avec adresse,
 Luy repartiit & accorda,
 Non pas tout ce qu'il demanda,
 Mais seulement vne partie,
 Dont la populace auertie,
 Quand ils sortirent les poursuit,
 Se plaint, murmure, & fait grād bruit.
 Le Parlement tres estonné
 De ce succez inespéré,
 Voyant que ces ames vulgaires
 Traittoient ainsi leurs Tutelaires,
 Fait de necessité vertu,
 Et de diuers soins combattu,
 Deux à deux en belle ordonnance
 Vers le Palais Royal s'auance :
 Le peuple redouble les cris,
 Les plus hardis se trouuoient pris,

Pesse-messe avec la canaille,
 Le soldat se met en bataille,
 On murmure, on parle, on discours
 Dans l'anti-chambre & dans la Cour:
 Ainsi ces Messieurs arriuerent,
 Et par le grand degré monterent,
 Chacun se rengant à l'entour,
 S'enquiert d'où vient ce prompt retour,
 L'un disoit faisant grize mine,
 Le retour vaudra bien matiné:
 L'autre d'un gracieux maintien,
 Croyez-moy ce ne sera rien:
 Et chacun selon son genie
 Rioit ou n'en rioit mie.
 Comme le mal estoit pressant,
 Que le danger alloit croissant,
 On resolut sans plus attendre
 De relascher & de les rendre,
 Cheuaux & coches attellez
 Et proches parens appelez,
 On s'achemine en diligence
 Droit au Menil Madame Rance,
 Où Bruxelles estoit arriué,
 Ceux qui furent de ce costé
 Passerent avec plus de peine
 Que ceux qui estoient à Vincenne.
 Apres auoir fait maint detour,
 Quand la nuit eut chassé le iour
 Sentirent sur eux pesse-messe
 Tomber des cailloux vne gresle,
 Qu'en la rue des Chiffonniers
 On iettoit du haut des greniers,
 Toute la populace émeüe
 Crioit demeure, tue, tue, tue,
 Et dans ce populaire effort
 Tout leur representoit la mort.
 Demeurer, c'est chose mortelle,
 De reculer point de nouuelle,

Mais le Coudray se resolut
 Ainsi que le bon dieu voulut,
 De leur faire vne tentatiue.
 On luy crie de loin, Qui viue ?
 Viue le Roy ; ce n'est assez,
 Viue le Parlement, passez.
 Qui estes vous gens des Enquestes ?
 Fauorables à vos requestes,
 Amis qui pour vous secourir
 Hazarderons iusques au mourir,
 Tout de bon n'en faites nul doute,
 Messieurs de nuit on ne voit goutte,
 Mais d'aller ainsi sans flambeau,
 Morbieu cela n'est bon ny beau,
 C'est affronter le corps de garde,
 Pour vous nous ny prenōs pas garde,
 A Nosseigneurs tout est permis,
 Et vous estes de nos amis.
 Eux échappiez de la déroute
 Suiuent pareillement la route,
 Et firent si bien leur deuoir
 Que Blanc-mesnil vint dès le soir :
 Cependant nos nouueaux gēdarmes
 Ne voulurent poser les armes,
 Ny rentrer dans leurs maisons,
 Ils alleguent mille raisons,
 Disant que l'on les veut surprendre,
 Qu'il se prepare vn grand esclandre,
 Que l'on pretend les renfermer
 Dans Paris pour les affamer,
 Vier enuers eux de finesse,
 Boucher le chemin de Gonesse,
 Qu'il n'y a rien pour le certain
 De si long comme vn iour sans pain,
 Et qu'ils y donneront bon ordre,
 Tout Paris est plein de desordre,
 De terreur, de crainte & d'effroy,
 Sans neantmoins sçauoir pourquoy, F.

La nuit se passe de la sorte,
 Sans souffrir que personne ne sorte,
 De la ville dans le fauxbourg.
 Quand le Soleil fut de retour
 Quelques gens arriuent en foule,
 Qui disoient que proche du Roule,
 A Boulogne & aux enuiron
 Paroist quantité d'escadrons,
 Qu'ils en ont veu bien près de mille.
 Le peuple à s'alarmer facile
 Prend cela pour argent comptant,
 Et s'en trouble tout à l'instant,
 Gronde, tempeste, s'effarouche,
 Dit ce qu'il luy vient à la bouche,
 Et tout luy deuenant suspect,
 Parlant sans crainte & sans respect,
 Que ce malheur est sans remede,
 Et que la Reyne de Suede,
 Konigsmar & le Loup-garou
 Ont pris leur quartier à sainct Clou.
 Quelqu'un dit qu'il a veu la Seine
 De monstres marins toute pleine,
 qui ont en main le coutelas
 Conduits par le poisson Colas,
 Et que les ayant veu parestre,
 S'approchant pour les recognoistre
 Soudain s'estans mis à plonger
 De leur nombre il n'a peu iuger;
 que neantmoins la troupe est grande,
 Et qu'ils sont bien plus d'une bande,
 que l'on doit à son sentiment
 Craindre vn funeste euenement,
 Et qu'il y a parmy ces bestes
 quelques Chimeres à cent testes,
 Le peuple qui croit de leger,
 Et qui ne craint que le danger,
 Dit que cela pourroit bien estre,
 Que mesmement deuant Bissestre

Il paroist des Magdaleons
 Montez sur des Cameleons.
 Que l'on y voit des Hypogrifés,
 Des Caualliers ou Hieroglyfés,
 Qu'entr'eux mesme sur vn dragon
 On recognoist le Roy Hugon,
 Qui pour leur gloire certaine
 Est party de Tours en Touraine.
 Que cecy n'est point vision,
 Et qu'ils sont plus d'un million,
 Qu'ils iettent le feu par la gorge,
 Qu'il faut mander M. saint George,
 Lequel depuis plus d'an & iour
 Au sepulchre fait son seiour,
 Faire en sorte que la Pucelle,
 Ainsi qu'il combatit pour elle,
 L'engage en ce malheur pressant
 Au secours d'un peuple innocent.
 La ville a cette renommée
 De nouveau se voit rallumée,
 Et quelque vin dessus le ieu
 Dont ils auoient pris plus qu'un peu,
 Faisoit que les gens venerables
 Estoiēt de raison peu capables,
 Quand à neuf heures du matin
 On vit au fauxbourg saint Martin
 Arriuer pas bonne auenture
 Monsieur Bruxelles & sa voiture.
 Ce retour fit vn coup du Ciel,
 Le peuple deposa son fiel,
 Dé deux costez se range en haye,
 Mais pourtant craignant vne baye
 Veut voir le bon homme chenu
 Qui de force gens n'est cogneu,
 Aussitost qu'il monstre la teste,
 Chacun son harquebuse preste,
 Son mousquet & son poitrinal
 Fait vne salue en general.

Par tout le cry se renouuelle
 Viue le roy, viue Bruxelles,
 Quatre cens hommes à l'instant
 Le conduisent tambour battant,
 Et le promenant par les ruës ;
 Les chaines furent détendues,
 Tous les tonneaux sont renuersez,
 Mais non les soupçons effacez :
 Il est conduit en la grande Chambre,
 Ses Compagnons furent le prendre :
 En suite vn arrest est donné,
 Par lequel il est ordonné
 A chacun d'ouurir sa boutique,
 Les Clercs reprendre leur pratique,,
 Mousquets remis aux rateliers,
 Maçons presis à leurs ateliers,
 Les Charretiers à leurs charrettes,
 Les Vinaigriers à leurs broüettes
 Les Mareschaux à leurs marteaux,
 Porteurs d'eau reprenēt leurs sceaux,
 Les Charpentiers la besigue,
 Et la magnifique Cohue
 Tout doucement se separa,
 Chacun chez soy se retira,
 A la Cour ainsi qu'à la ville,
 Tout parut remis & tranquille,
 Chacun reprit sa belle humeur,
 Ainsi finit cette rumeur.
 Je ne scaurois vous faire entendre
 S'il y a du feu sous la cendre ;
 Mais sans pousser l'affaire à bout
 Nostradamus & Dieu sur tout.

F I N.